

續修陝西省通志稿

第四十九冊

卷八十八至八十九

續修陝西通志稿卷八十八

人物十五

孝義三

王治順商州人鄉飲耆賓乾隆己亥秋雹災治順出粟賑饑活人以萬計嘉慶丙辰歲歉又捐粟百餘石賑濟鄉人德之

王錫桂商州人道光壬辰武舉同治三年口逆由漢中過州境擄掠漢南一帶壯丁無算時錫桂充東鄉團總避難山砦捐貲樹旂招收難民及賊退走難民集至千餘人按口給粟以活生命事平詢其住址給以路票各給資斧俾回原籍後多登門叩謝者其孫維綱官沔縣教諭或來署叙及猶感念不置云

王義發商州人口匪之亂繼以蝗災山外饑民自咸寧蒲臨逃至州境牧護關乞食者甚衆啼饑號寒慘不忍聞義發普給錢食又

以房田押借錢九百六十千儘數施捨後山外受恩者一百八十餘家公送匾額以誌不忘光緒丁丑庚子兩次大饑義發捐糧百餘石並錢三千八百餘緡散給貧民忘家救難紳民感念不置云雷鳴瀛商州人同治九年率團剿回匪於東鄉屢戰皆勝後匪勢猖獗團衆被圍勢不能脫鳴瀛奮勇直前吼聲如雷殺賊數十圍始解救出難民無算民賴以安大吏獎給六品銜

周登桂商州人附貢生幼失恃事父及繼母孝父有疾登桂乘馬延醫倉皇俱墜巖下馬斃登亦受重傷乃徒步往事繼母每諫輒被撻罵無稍怨尤母病衣不解帶親侍湯藥並於各廟焚香祈禱呼天籲地求以身代及母歿泣下如血人多奇之

譚詩琪商州人業農性至孝父早卒母有疾醫藥罔效割股肉以進仍不效遂許長齋朝太白山時值嚴寒身著母衣首蒙母帕赤

足行三步一拜母疾果愈七十餘歲乃卒居喪三年不如葷酒

李春夫商州人父全福患痰疾醫藥罔效乃焚香默禱於祖宗神明以利刃剖胸割肝一片煎湯奉父遂愈踰年母始知言於人州牧旌獎

張克玉商州人家貧務農善事其母值口口口餘黨擾害克玉棄妻子不顧惟負母避難卒無恙同治元年飛蝗傷稼幾盡獨至克玉田向空飛去人謂純孝所感云

屈成儒商州人母馬氏守節撫孤成儒事奉孝謹母歿既葬墳塋距家隔河三里而遙每夜親往守墓三年無間雖嚴寒盛漲必至偶值日暮水深數丈鄉衆勸阻弗聽褰裳而涉冥冥中若有扶助者人皆歎爲孝行格天鬼神呵護云

魏光晉商州人少喪母父遠遊不歸賴祖母撫養成人後祖母老

病醫藥罔效光晉情急割股肉烹羹以進病勢漸痊又十餘年無

病而終

並探訪冊

劉鳳年鎮安人庠生少失恃事父及繼母孝母患咯血鳳年慮不起乃懷利刃禱於神割股肉和藥以進遂愈父患疝氣數十年呻吟痛苦鳳年乞神藥療之病若失每晨必肅衣冠問視父母或怒詈則拱立以聽退書訓詞於冊

陳洪量一名廷策鎮安人學問淵博同治元年口逆擾境擄其祖父朝慶將殺之洪量甫十齡長跪哀乞願代祖父死賊奇之釋朝慶掠洪量去至湖北均州逃歸力學不倦卒成名

徐煥新鎮安人庠生事嗣父母至孝父病煥新割股肉和藥進之病竟愈鄉里贈以匾額曰孝思不匱

吳登科鎮安人武生性好善常施寒衣捐修古道嶺路二十餘里

歲荒振饑施錢至數千緡

並採訪冊

李燦字子昌雒南人諸生少失怙恃鞠於祖母陶氏祖母歿廬墓三年手植松楸負土成壟事聞旌表建坊

孫振雒南人天性素篤年六十居母喪既葬結廬墓側晨興戴土百步外爲馬鬣封日必三次塋地高燥乏水戚族或遺之振偶見墓左土氣滋潤稍掘竟得泉雖亢旱末嘗涸也

樊向榮雒南人少孤事母孝母歿依墓爲廬獨居三年鄉黨稱之同邑楊天位早喪母事繼母如所生居母喪年已六十猶致哀毀廬墓三年

何三公雒南人父母先後卒廬墓凡六年鄰有妖祟害人每聞三公至即懼伏不動叩之則曰畏何孝子耳流寇入雒執三公身被數創詈賊不止賊趣殺之同難者交口乞貸其死曰此何孝子也

續陝西通志 卷八十八
因述廬墓事賊義而釋之乃助以貲

王渤雒南人母蚤卒繼母孫喉其父以家貲詒己子而閉渤兄弟室中椎擊幾死渤偕弟逃之真定爲兵六七年異母子死父召渤歸始就學補諸生父歿事孫仍盡孝孫亦感悔渤嬰疾遺命其子曰我死慎無彰我孝以形父母短也其至性過人如此

楊獻雒南人少孤奉母至孝家貧爲人傭輒舍食遺母後耕山中栖茅屋夜半突火發母老不能奪門出獻倉皇無措以身蔽母號泣忽大雨火滅母子得全

蘇林雒南人事父母能承志母病嘗糞慮不起輒流涕拜禱求以身代居喪哀毀無所虧禮父病革林日夜侍側衣不解帶者四旬餘父病少間拊其背曰汝孝子也

並縣志

何旣道雒南人樂善好施歲荒出粟千石救饑全活甚衆監司守

令均表其閭

陶瑞雒南人增生性孝友昆仲三人瑞爲長次弟早卒少弟游蕩家遂中落饗殮不繼而瑞奉母備極甘旨不忍與弟析炊從叔敬培歿於蜀瑞奮然往搬柩從姪某疑有遺財自願從行歸途遇口匪之變衆皆棄柩遁姪被戕瑞獨守柩匿榛莽中兩晝夜鬚髮盡白卒扶柩歸光緒三十年旌表祀忠義祠

王永正雒南人事親孝同治初口匪入境大肆擄掠家人皆奔避時永正年已五十矣其父八十三歲艱於步履永正負之以逃爲賊追及永正哀乞代死賊憐而並捨之後舉鄉飲介賓

王明玉雒南人監生樂善好施道光十六年大饑捐糧賑濟灾民凡三次共散粟千餘石西峪河捕珠川李家河居民三百餘戶均賴以存活鄉黨爲立石紀其事

齊瀛洲號海菴維南人性純孝父歿廬於墓捧土封墳三年罔間
道光癸未大饑出其粟周卹鄰里無吝色尤善教育門下士多所
成就

王全義維南人原籍武昌幼隨父遷維旋失怙家赤貧惟恃傭工
養母未幾母失明全義年甫十四不忍遠離每日鷄鳴負柴擔行
五十里抵縣城易升斗歸以爲養病則殷殷侍湯藥嘉慶二年白
蓮教匪至境全義夜負母由山巔赴縣荆棘深沒脛不暇顧母歿
家稍裕喪葬盡禮嘗施藥餌以濟鄰里偶拾白金百餘兩坐而俟
之失金者至還以原金客贈二十金堅辭不受後舉鄉飲耆賓
郝士魁字星五維南人性敦厚醇樸讀書明大義應童試不售道
光中舉鄉飲正賓子五能遵庭訓以詩禮相琢磨孫二十餘人曾
孫十餘元孫二男女百二十餘口一門雍穆無詬諍聲邑令以五

世同堂旌其門士魁卒年八十有九自高祖以來已七世同居矣
郭玉書字麟庭雒南人事親以孝聞家本素封每代只一子相傳
玉書自念丁單日以行善爲事凡造橋補路建倉無不捐貲倡首
周恤貧乏施食施衣數十年不倦鄉里有善人之目同治元年口
逆擾雒玉書捐貲辦團頗資保障有自賊中逃出者量其家之遠
近悉贈川貲光緒丁丑大饑玉書積粟千鍾或曰糶之可富甲一
郡玉書乃捐以助賑復罄所積設廠施粥全活甚衆大吏旌其門
踰年果生兩孫子姓孫曾多至二十餘人卒年七十有五長子成
禮官甘肅撫彝通判自有傳

鹿獻瑞雒南人性篤孝光緒七年由廩貢生授蒲城訓導時父年
八十矣獻瑞在任三年時虞風燭乃告終養歸父歿廬墓三年同
邑李竹事親以孝聞親歿廬墓三年日必取土數里外以爲馬鬣

封風雨寒暑無間時人賢之又冀州俊昆仲四人一門孝友事親力所能致者不留餘力及親寢疾兄弟侍側衣不解帶藥餌必嘗而後進親歿俱哀毀骨立廬墓三年見者皆歎美之

陳重元字伯龍雒南人幼孤母氏柴甘貧守節教之成立母病醫治罔效重元乃於中夜焚香露禱乞以身代並刲臂肉和藥以進疾遂愈及生子母誨重元曰汝幼廢學吾不能無憾異日須令吾孫好讀書勿墮家聲吾死瞑目矣後子入塾教之綦嚴蓋遵母命也重元雖困窮多方假貸日必以肉食進母母性方嚴左右就養務得歡心居喪哀毀盡禮喪葬不遺餘力計母歿四十年猶孺慕不衰云同邑程衍江家貧力農目不識丁而性至孝母寢疾衍江朝夕侍藥餌皇皇如有所失乃潛割股肉入糜以進母病霍然愈黃振海字懷武雒南人英勇邁衆遇事敢爲恤老憐貧抑強扶弱

鄉里莫不悅服嘉慶丁巳教匪之亂焚掠居民地方騷動振海充當義首自備糧秣團練鄉勇星夜剿襲擊斃匪首張宏珍等三百餘人已未秋賊復至人心惶恐龍駒寨州判蓋方泌拒賊於火石嶺賊將遁振海策其必由龍潭溝經過乃拔營進擊恰與賊值自辰至午合戰三次斃賊百餘奪獲馬騾器械餘衆盡潰一鄉賴以保全事聞賞六品銜以千總候銓同邑田正元字貞卿急公義有膽略嘉慶二年教匪千餘突至板廟河紅巖溝時田姓族繁多僑居者正元充義首袒臂一呼鄉團響應擊斃匪首戴金花及從匪七十餘人聲威大振賊不敢犯道光十六年歲大侵正元倡捐助賑全活甚衆迨光緒三年奇荒其裔蘭芳亦以毀家辦賑爲一鄉矜式蘭芳字獻瑞分發四川巡檢在籍充團正同治三年口匪擾境蘭芳與團副張仁禮率義勇三千奮擊殲匪百餘奪獲馬匹器

械多件擒匪首雷震漢陣亡團丁白占勝賊越嶺去景村團正祝
恒太率衆千餘豫伏兩山中以擡鎗長龍礮塞徑兩堡木石俱下
匪不支踰山竄散雒邑南境得免蹂躪者蘭芳之力居多也事聞
蘭芳加同知銜恒太暨占勝子俱獎六品軍功仍給恤葬銀兩

王正心字一哉雒南人廩生性孝友家貧嗜讀書耕田夜入學間
走潼關百數十里販鹽以爲事畜資手足胼胝暇仍不釋卷後設
帳教授二十餘年嘗謂誤人子弟罪浮於殺人父兄故生徒濟濟
成就甚衆光緒三年大饑正心竭力襄賑不侵款項鄉黨賴之子

珍字聘初光緒甲辰進士任甘肅張掖知縣

並採
訪冊

楊聖朝山陽農民乾隆時以開墾致富以其家資之半報效國家
助河工捐賑務子繼雲官山東日照沂水等縣知縣不妄取民財
其本縣善舉如興學建倉施義塚並捐租十餘石作養濟院永久

經費光緒末猶利賴之又謝姓佚其名鄰邑鎮安人乾隆時家最富田地徧山鎮兩縣臨終遺囑鎮之田留充子孫饘粥山之田捐作山陽義學經費今高級小學校所收地租皆其賜也

詹姓佚其名山陽人精拳術有膽略嘉慶時教匪麇至詹恐其蹂躪鄉里也率子姪八人揮刀直入殺賊數千賊鳥獸散迄今父老猶樂道之同邑武舉阮大德字育臣咸豐時率鄉兵數千堵賊於殺虎嶺悍鬪兩晝夜鄉兵潰散大德獨殿後猶手刃騎馬賊十餘人焉

王官字雲紀商南人天性孝友敬謹自持六世同居遠近皆知其名曹正江正廣昆仲均商南國學生治家得張公藝法百口同居老穉無異言嘉慶初教匪之亂隨其叔聖顏捐餉練團敗賊於萬家坪賊遠竄凡陣亡者皆備棺殮埋十九年大飢捐銀四百兩糧

六百石以賑本堡災民道光十三年飢捐賑如前後值蝗災又捐銀三百兩爲捕蝗費邑令旌其門

朱謙益字受之商南人性肫厚有大志少貧賈於荆紫關致富光緒初大飢謙益糴糧賑濟全活甚衆十三年捐銀二千兩買田收租立賓興會又捐租四十石分設義學於關鎮及本堡並印刷活世生機功過格擊磬錄等書千餘部分佈勸善他如宗族戚友廟宇津梁隨時補助不可勝紀生平孝友過人親寢疾常隔日不食親歿廬墓三月歸家後哀痛不置堂弟某日以殺兄爲事謙益友愛彌篤感化無形迄今子孫蕃衍書香不替人以爲好善樂施之報云

賀樾字榕軒商南人性渾厚慷慨好施每值歲荒必竭力賑濟歷年施助不下數千金自置一斗較市斗多容一升糴糧則用之更

廉其價而以市斗收租排難解紛周恤親族善人之稱數十里內
無間言

並縣志

王朝簡商南人嘉慶二年教匪將入境朝簡充青山堡義首率團
勇三百人禦之盧氏界嶺與賊決戰斷其後尾殺數十人賊不敢
入境大吏獎給六品軍功又青山堡義首王泰恒事繼母以孝聞
同治初口匪入境泰恒聯絡鄉民設法堵禦捐貲修文筆霸王陰
巖烏龍朶四寨保全多人將軍多隆阿獎給五品藍翎鄉里至今
稱頌不置

採訪冊

畢之琦潼關廳人年十三爲人傭主人與肉食必請歸奉母後佃
人田以身代牛破脊出血不令母知母歿廬墓三年言及母苦節
輒悲慟乾隆四年旌表

劉進純潼關廳人歲貢生性純孝事嗣父母如所生親死廬墓三

年嘉慶五年旌表

張大智潼關廳人少孤家貧事母至孝母病久醫藥罔效聞割股可療乃於靜夜焚香割左臂肉以進母嘗而異之詰其妻以實告母大驚汗出而愈

賁自立潼關廳人業農母患心痛百藥罔效自立乃默禱引刀割左臂肉烹以奉母遂愈

劉鶴鳴潼關廳人少孤傭工奉母乾隆三十八年母病劇思肉食鶴鳴念割股可以療疾乃割股肉烹以進病遂若失後母見其傷痕詰之詭詞以對卒不使母知鄉里稱之

並廳志

寧鳳超字仰亭潼關廳人同治初以城防勞得武畧騎尉職後病篤謂妻周氏曰我母年逾六十子甫六歲我死則養老送終教子成人諸事皆不能盡可奈何乃令變賣衣物與妻之妝奩得錢八